

續修四庫全書

《續修四庫全書》編纂委員會編

續修四庫全書

上海古籍出版社

八一九・史部・政書類

皇朝續文獻通考四百卷（卷二百四十二至卷三百十二）

劉錦藻撰

.....一

2695/10

皇朝續文獻通考卷二百四十一

賜進士出身頭品頂戴前內閣侍讀學士臣劉錦藻恭纂

刑考一 刑制

臣謹案制刑之道有因地因人因時三義而因時制宜尤爲刑法中一大關鍵我朝未入關以前刑制止斬決鞭責兩項自世祖定鼎燕京統一實區命儒臣詳定刑法一沿前明舊律略加條例歷聖祖世宗高宗三朝久遠化成幾於刑措不用雍雍乎三代之休風焉故刑法迭次減輕一革國初嚴重之例如強盜分別斬逆子孫改斬爲遣之類其間因革損益折衷至當前考已詳舉無遺茲不復贅自仁宗御極後承平日久法令縻弛地大物衆孽牙其間於是川楚教匪突起蔓延十餘年倣擾四省繼以宣宗末年夷氛方熾粵匪肇亂文宗穆宗二十年來兵革不息奸宄蜂起不得不用嚴法以示懲創故刑法復由輕入重如強盜復改歸斬舊律嚴懲搶奪發塚掘人勒贖賣人口入洋等項之類迨及德宗內憂繼息外患迭起刑法愈趨嚴重章程繁密較前加倍然大經大法完全無缺仍不失爲金科玉律至光緒三十年後朝命變法一時新學當道倣外國三權鼎足司法獨立之制特設法院編置法內則三法司裁去都察院改刑部爲法部改大理寺爲大理院外則改按察使爲提法司內外均設審判廳分高等地方初級三等各審判廳外又設檢察廳大理院外設總檢察廳所有訴訟外則均歸審判官審理州縣不得干預內則歸審判廳大理院審理法部不能干涉此改革刑官之大概也其刑法則聘用日本博士岡田憲代舊律大清條例一概廢除全依日本法修訂名曰新刑法不惟文義名詞盡倣外洋並舉歷代之服制名分禮教一掃而空草萊一出舉國譁然內則九卿科道外則各省督撫羣相詬病紛紛奏參朝廷迫於公論慮其窒礙難行復飭法律大臣另修見行律以備新舊過渡時代之用此改革刑法之大概也查見行律刪去律文數十條例文數百條從前之緣坐凌遲梟示戮尸枷號刺字鞭

責鐵桿石墩笞杖諸法盡行刪除又改死罪爲流徙者數十項以致法輕易犯利弊參半然先王之遺制猶有存焉若新刑律則三綱九法數其弊不可勝言矣謹依前考作刑制八卷其餘徒流詳載續刑教宥以次編入

嘉慶四年正月大學士和坤伏誅奉 上諭昨經降旨將和坤罪狀宣諭各督撫令其嚴罪茲據直隸總督胡季堂奏稱和坤喪盡天良非復人類種種悖逆不臣盡國病民幾同川楚賊匪貪贖放蕩真一無恥小人喪心病狂目無君上請依大逆律凌遲處死並查出和坤薊州墳塋僭妄遠制及附近州縣置有當舖資財見飭查辦各等語又據連日續行抄出和坤金銀等物特再行諭衆知之朕於乾隆六十年九月初三日蒙 皇考冊封皇太子尚未宣布 諭旨而和坤於初二日即在朕前先遁如意漏洩機密居然以擁戴爲功其大罪一上年正月 皇考在圖明園召見和坤伊竟騎馬直進左門過正大光明殿至壽山口無父無君莫此爲甚其大罪二又因腹疾乘坐椅轎擡入大內肩輿出入神武門衆目共觀毫無忌憚其大罪三並將出宮女子娶爲次妻罔顧廉恥其大罪四自勦辦教匪以來 皇考盼望軍書刻篆宵旰乃和坤於各路軍營遞到奏報任意延擱有心欺蔽以致軍務日久未竣其大罪五 皇考聖躬不豫時和坤毫無憂戚每進見後出向外廷人員敘談談笑如常喪心病狂其大罪六昨多 皇考力疾披章批諭字畫間有未真之處和坤膽敢口稱不如撕去竟另行擬旨其大罪七前奉 皇考諭旨令伊管理吏部刑部事務嗣因軍需銷算伊係熟手是以又 諭令兼理戶部題奏報銷事件伊竟將戶部事務一人把持變更成例不許部臣參議一字其大罪八上年十二月內奎舒奏報循化貴德二廳賊番聚衆千餘搶奪達賴喇嘛商人牛隻殺傷二命在青海肆劫一案和坤竟將原奏駁回隱匿不辦全不以邊務爲事其大罪九 皇考升遐後朕諭令蒙古王公未出痘者不必來京和坤不遵諭旨令已未出痘者俱不必來京全不顧國家撫綏外藩之意其居心實不可問其大罪十大學士蘇凌阿兩耳重聽奏遺難堪因係伊弟和琳姻親竟隱匿不奏侍郎臣省蘭李漢太

僕寺卿李光雲皆曾在伊家教讀並保列卿階兼任學政其大罪十一軍機處記名人員和坤任意撤去種種專擅不可枚舉其大罪十二昨將和坤家產查抄所蓋楠木房屋僭修殿制其多寶閣及隔段式樣皆仿照 寶壽宮制度其園囿點綴竟與圓明園蓬島瑤臺無異不知是何肺腸其大罪十三薊州墳塋居然設立亭殿開置隧道附近居民有和陵之稱其大罪十四家內所藏珍寶內珍珠手串竟有二百餘串較之大內多至數倍並有大珠較御用冠頂尤大其大罪十五又寶石頂並非伊應戴之物所藏真寶石頂有數十餘個而整塊大寶石不計其數且有內府所無者其大罪十六家內銀兩及衣服等件數逾千萬其大罪十七且有夾藏藏金二萬六千餘兩私庫藏金六千餘兩地窖內並有埋藏銀兩百餘萬其大罪十八附近通州薊州地方均有當舖錢店查計資本又不下十餘萬以首輔大臣下與小民爭利其大罪十九伊家人劉全不過下賤家奴而查抄資產竟至二十餘萬並有大珠及珍珠手串若非縱令需索何得如此豐饒其大罪二十其餘貪縱狂妄之處尙難悉數實從來罕見罕聞者著將胡季堂原摺發交在京文武三品以上官員並翰詹科道閱看即着悉心妥議具奏此外如有自抒所見者不妨另摺封陳若意見皆合即連銜具奏至福長安祖父叔姪兄弟世受 厚恩尤非他人可比其在軍機處行走與和坤朝夕聚處凡和坤貪黷營私種種不法罪狀知之最悉伊受 皇考重恩常有獨對之時若果將和坤縱恣藐玩各款據實直陳較之他人舉劾尤爲確鑿有據 皇考必早將和坤從重治罪正法如從前辦理親親之案何曾稍有寬縱豈尙任其貽誤軍國重務一至於此即謂 皇考高年不敢仰煩 聖慮亦應在朕前據實直陳乃三年中並未將和坤罪蹟奏及其扶同徇隱情弊顯然如果福長安曾在朕前有一字提及朕斷不肯將伊一併革職察問見在查抄伊家資物雖不及和坤之金銀珠寶數逾千萬但已非伊家之所應有其貪黷昧良僅居和坤之次並著一併議罪旋以和坤二十大罪宣布天下賜自盡福長安定爲斬監候秋後處決大學士蘇凌阿以原品休致吳省蘭李潢李光雲皆以和坤私黨降黜有差

臣謹案元惡巨慝鍾天地厲氣雖盛世亦不能絕惟在人主嚴明剛斷放流而殛誅之小人一去君子道長矣我 朝大奸魁拜而後和坤爲最魁拜擅威權於 聖祖冲幼之年和坤謀不軌於 高宗耄耄之際離罪惡不同其誤國殃民一也 仁宗踐位之初首發和坤之罪立正典刑譬雷霆一震甘雨隨之大學謂仁者能愛人由於能惡人 廟號爲仁不亦宜乎

五年 諭豫省劉之協解京後令軍機大臣會同刑部連日審訊業據將起意謀反各情節供認確鑿昨廷訊後即將該犯凌遲處死然辦理劉之協之故並非因該犯係白蓮總教首遂加以極刑也劉之協假白蓮教傳徒以根基錢打丹銀爲名其初原不過斂財起見追行之日久不能哄誘愚民遂買王雙西託名牛八指稱朱姓後代又將劉松之子劉四兒託名彌勒佛轉世可以補助牛八希圖發動衆人謀爲不軌其罪在此我朝 列祖 列宗厚澤深仁凡在編氓無不淪肌浹髓乃劉之協捏稱明代後裔誘惑愚民有心謀逆實屬罪大惡極前蒙劉松宋之清等破案時劉之協在扶溝聞信脫逃蒙 皇考屢次嚴飭各省購緝原因劉之協係屬謀逆要犯不可不迅速擒捕初不因其傳習白蓮教之故彼時各省地方官未能仰體 皇考聖意竟以查拏邪教爲名四處搜求任聽胥役多方勒索不論習教不習教只論給錢不給錢以致含恨之人與習教者表裏勾結藉無可容身之名紛紛蠢動起於襄陽蔓延川陝迄今勦辦五年尙稽藏事其實劉之協數年以來在鄧州新野地方往來潛匿地方官並未查察可見搜拏邪教大率拖累無辜而實在叛逆首犯轉至任其漏網多年至於白蓮教名目由來已久即據劉之協所誦經文大意亦不過勸人爲善並無悖逆字樣劉之協之罪犯寸磔在於託名牛八潛造逆謀孽由自作與白蓮教無涉譬如儒生誦習孔孟之書尊崇正教設見在川楚陝甘滋事賊匪或有一二文武生員脅從在內豈因此而遂以儒相詬病等而下之其學習白蓮教者持齋誦經原與齊民無異詎因白蓮教內有劉之協一人而遂指習教之人概爲匪黨嚴行查禁乎即如賊匪中平日習白蓮教者固屬不少然各省

地棍蠶桑之類亦不一而足但經抗拒官兵即一律剪除罪在不赦其自賊營投出者不下數萬人無不一體妥爲安置又何嘗根究其從前曾否習教乎若朕欲禁絕白蓮教何難向劉之協刑求同教之人一一追究且見在劉之協供明脫逃後潛匿河南鄧州新野地方應歷可據所以不加深究者原以劉之協同教之人但能各安本分原可置之勿論即失察劉之協之地方官朕尙加恩概免追問則凡平日與劉之協熟識容留藏匿之人豈肯令地方官轉加究詰乎劉之協係白蓮教檢惡最久之人尙不肯因此稍有株連況其同教中人數衆多焉有一一查究之理總之見習白蓮教者安靜守法即是良民地方官毋庸查拏若聚衆煽惑即非素習白蓮教之人必當按律懲治所以辦理劉之協原委及朕不加追究白蓮教至意明白宣諭中外咸使聞知

謹案其時川楚教匪猖獗 仁宗姑從寬典特頒此 諭以解散脅從俾民自新至習教向在例禁十八年復頒 旨申禁非真以白蓮教可不同也

十月定辦理秋審官犯服制黃冊毋庸先期進呈之例 諭曰每年刑部辦理秋審呈進黃冊俱係將各省情實官犯及服制人犯首先進呈一經分別予句後該部即行文各該省不論遠近部文到日即遵照處決其餘常犯則按照省分遠近進呈黃冊以次句到此向來辦理成例也惟念勅法明刑務存矜恤所有罪應斬絞人犯除立決外餘令監禁俟秋後處決者原係於執法之中寓哀矜之意該犯等於未屆句到以前或在監所病斃得免肆市亦屬法外之仁今因係官犯服制即將黃冊先行進呈其予句人犯部文一經到省即日行刑是同一秋審而此等官犯服制較之各省情實常犯處決日期近省或早至一二月遠省亦早至月餘及數旬不等先行受法且各省官犯中多有令其解交刑部監禁者例應歸入朝審辦理其句到之期又在各省常犯之後是同一官犯轉因解部監禁而處決日期較之在本省監禁候決文到施刑者又復遲早懸殊未爲平允著自本年爲始刑部辦理秋審其官犯服制黃冊毋庸先期進呈俱於每次呈進各該省情實常犯招冊時將此二項人犯另繕黃冊列於黃冊

常犯之前一併呈覽聽候句到以示格外於全用刑務得其平至意著爲令

六年御史鄭敏行請定觸犯父母發遣人犯不准援赦之例奉 諭此等違犯向例皆不准援赦嗣於乾隆六十年查辦發遣人犯欽奉 皇考高宗純皇帝特旨如查詢伊祖父母父母母願令其同籍者即准釋回敬釋 聖意子孫違犯

教令其祖父母父母母發遣或係出於一時氣忿及其子孫遠戍後未必不心存繫念是以 皇考特諭有仍願子孫回家者准其援赦係曲體天下爲祖

父母父母母之心並非於會犯忤逆之人稍有寬宥自當永遠遵行乃該御史摺內稱彼時 皇考因次年卽值歸政之期法外施仁尤屬措詞失體我 皇

考矜慎庶獄六十年如一日此事特溥如 天之仁推而至於庶民愛子之至情與歸政何涉該御史輒冒昧陳陳乎至該御史既知以孝治天下豈有 皇

考欽定例條輕言更易之理所有觸犯父母發遣人犯如遇恩赦傳詢各犯祖父母父母有願伊子孫回家者仍欽遵 皇考諭旨准其釋回以符孝治天下

之義倘赦回後再有忤逆情事一經呈告卽當加倍治罪至前定父母已故准

令釋回條例彼時軍機大臣等所議原未允協忤逆發遣之人若謂伊父母已

故不致再爲忤逆情事卽准釋回殊非情理況該犯等於親在時既敢於違犯

失其歡心又安望其有依戀墳墓之誠耶此一條著卽刪去仍遵例不赦

九年四月老母教匪王添組伏誅奉 諭奏承恩奏續獲逆匪審擬具奏一摺

覽奏俱悉此案素習老母教之王添組卽王瑞忠捏稱彌勒佛轉世煽惑鄉愚

上年慶幹周起事之時想其幫助許爲上清宮教主該犯輒自稱瑞忠法中皇

寫入旗內號召衆人實爲罪大惡極若日久潛逃必致養癰貽患奏承恩於訊

出之後能不動聲色設法鉤致密將該犯及助惡之曾啟三周仲祥王添保一

併拏獲搜出旗式底稿訊得實將該犯等分別首從問擬凌遲斬決卽請王命

正法傳首示衆俾地方匪徒知所儆戒所辦甚好其各教內安靜守法未經滋

救人之災難乎可見邪說斷不可聽徒自罹法網耳爾等鄉愚無知受其哄騙紛紛斂錢施捨隨同入教今亦不加深究但爾等見該首犯如此被拿伏法亦當共知猛省悔悟前非從此安靜家居勿再從教滋事庶可免罹重罪倘尙執迷不悟廣招醜類擅造謠言則憲章具在不能稍爲曲貸如此詳明曉諭示以利害民人等自必畏懼警省勉爲善良

十年正月逆犯董霖伏誅奉 諭陳大文奏查獲狂悖大逆重犯搜出字卷等件一摺逆犯董霖膽敢託爲夢幻編造逆詞狂悖已極罪不容誅見已特派侍郎貢楚克札布馳驛前往江甯會同審辦此時陳大文當先行研鞫且不必加以刑訊俟貢楚克札布到彼會同訊明後即在該處寸磔示衆其家屬亦應緣坐並詳查該逆家內是否另有悖逆字迹此外如訊有黨與即嚴拿歸案審辦如實無助逆人犯亦不必紛紛拘拏致滋拖累

五月會匪石慈等伏誅奉 諭刑部議奏方維甸審擬拿獲悄悄會匪一案將原擬斬決之首犯石慈改照大逆律擬以凌遲處死等因一摺此案首犯石慈本係已正法逆犯王伏林之徒孫膽敢藏匿匪邪經倡復悄悄會並自稱彌勒佛轉世所藏邪經內有劫數刀兵星象降臨等句並設立三宗五派名目糾集多人傳受合同暗號欲使素不認識之人異地相逢知係同會互相協助其謀爲不軌逆蹟顯然且以傳丹爲名肆意姦淫婦女其作孽甚重石慈著即照大逆律凌遲處死以昭炯戒石明二犯首先入會妄解三宗多方煽惑均係罪魁俱著即處斬梟示

十一年正月書吏杜斐堂正法先是直隸省查出司書王麗南等私離假印通同州縣虛收錢糧奉 旨正法未數日復有杜斐堂者需索酬謝偽造獎札假與人官得 旨杜斐堂即處斬

又達州營守備王國雄以扣留兵餉奉 旨即行正法

九月免侵吞庫項書吏陳錫鈺等死奉 諭上年直隸省州縣句串司書侵吞庫項一案當經降旨以各犯侵盜之多寡定罪名之輕重將侵銀二萬兩以上者立置重典侵銀一萬兩以上者亦於上年秋審予以句決尙有侵銀在一萬

兩以下之陳錫鈺等五犯亦俱問擬斬候入於本年秋審情實辦理各該犯串通書吏肆意侵吞其隱蔽分肥情節均屬罪無可逭特以朕上年定讞此案悉遵照從前 皇考高宗純皇帝辦理甘肅控災冒賑之例分別問擬查前此捏冒案內侵銀不及一萬兩之各官犯四十餘名亦經刑部問擬情實均蒙 皇考法外施仁免死發遣茲陳錫鈺等情罪與前案相類亦尙可寬以一綫所有直隸省侵吞案內各官犯除徐承勳一名業經病故外陳錫鈺馬河戴書培魏廷鑑四犯著加恩免其句決發往黑龍江充當苦差此乃朕祗遵 前膜於無可寬貸之中曲爲寬宥嗣後各省州縣等益當激發天良奉公守法毋謂寬典之可屢邀也

十三年 諭給事中周廷森奏請嚴懲聚衆一摺據稱近日之江南鎮州府亳州徐州府河南之歸德府山東之曹州府沂州府兗州府一帶地方多有無賴棍徒拽刀聚衆設立順刀會虎尾鞭義和團八卦教名目橫行鄉曲欺壓良善其滋事之由先由賭博而起過會場城市公然搭設長棚押寶聚賭句通書吏爲之耳目請飭下三省督撫認真捕緝清查保甲密訪爲首棍徒姓名聚賭械鬪之案拿獲盡法懲治並責成地方官嚴定緝匪等語江南安徽河南山東毗連各州縣既有此等匪徒自應嚴行懲辦以靖閭閻不可養癰貽患至清查保甲雖屬緝匪良法但地方官寄耳目於吏胥保正設里保之中皆其黨類仍不肯據實舉報總在府縣各官平日留心察訪隨案查拿將首犯嚴辦使脅從者知懼不敢隨同爲匪自不至釀成巨案株連多人若吏胥等與在官人役敢同包庇尤應密拿重辦剔除積蠹著交江南安徽河南山東各督撫認真查辦所有類毫等處各府州縣選送練幹廉明二員取其才堪治劇而又能寬猛得宜通曉事體並責令隨時整頓如此內有舊係備缺分而地方今昔情形不同初任之員難資事理者不妨奏明更調果能化俗宜民著有成效加以獎勵聞其不職者立予糾參

十四年 諭廣興前在東豫兩省審辦控案任意威嚇婪索賊銀數至累萬朕親加廷訊已降旨將廣興處絞廣興種種藐法營私伊雖已身罹重典尙覺罪

浮於法廣與之子蘊秀見係通政司學習經歷並著革職發往吉林充當苦差以示懲戒

謹案山東藩司邱庭澐據濟南府金湘張鵬昇稟借庫款四萬九千兩以辦供應巡撫長齡不即舉發與同往查事之周廷棟分別革職發遣並以山東各官官無一參奏予降一級調用所以防贖冒之漸不為不至矣四月巡漕御史英倫正法奉 諭軍機大臣會同刑部議奏將英倫擬絞請旨即行正法一摺國家設立巡漕御史四員自瓜儀以至通州分段巡查原以稽察弊竇催逼遲延從前積有陋規節經裁革添給養廉以資辦公膺斯任者理應潔己自愛勤慎奉職上年都察院請簡清差朕於科道各員就引見時派出四人英倫適在其內朕素未識其為人及伊請訓召見即覺其人頗平常當經嚴加訓誡嗣伊到任未久旋奏請患病開缺朕以其年力正強疑有捏病情弊另派趙佩湘前往於其赴任時諭旨密查趙佩湘一至東省即查其聲名狼藉據實密奏而英倫迎遇趙佩湘並告以病已漸痊其為欺飾已屬顯然因密飭馬慧裕吉綸將英倫劣款再行詳查節據覆奏誠證確鑿實屬目無法紀巡漕御史職在催查今英倫於每幫船入境時藉詞恐嚇勒索銀錢該弁丁輾轉攢湊自必耽延時日且銀不入手不予收文及告病後仍有印柄在手斷難越過之語是以催漕之官為阻漕之事並查勘泉源呵斥挑剔婪索多賦其挾勢求索所部財物於法實有所枉至御史職司風紀奉命巡查設地方官有不公不法之事尚應列之彈章其該管弁丁夫役人等如沿途有飲博宿娼等事藉端逗留者該御史即行查禁懲處乃英倫於行館喚妓住宿以執法之人躬為此無恥之事尤屬卑鄙不堪英倫係溫福之孫勒保之姪舊家大族世受國恩乃貪污縱恣一至於此實屬法無可有英倫著即處絞至英倫於巡漕時每以捆打恐嚇運弁是以朝廷之刑法為詐財之具應即令其身受責處用示懲創著派御前大臣軍機大臣會同刑部堂官將英倫監提重責二十板派御前侍衛富翰刑部侍郎景祿押赴市曹監視處決以爲奉差官員不念職守敗檢貪婪罔顧廉恥者戒

七月 諭前因山東即墨縣武生李泰清來京呈控伊姪李毓昌在山陽縣查賑身死不明一案當將全案人犯提京審訊今案情已鞫訊明確除另行按律辦理外李毓昌於上年中式進士後朕於引見時以知縣分發江蘇即用經該省上司委赴山陽縣查勘水災不肯扶同捏飾侵賑膽敢起意與長隨包祥串同李毓昌家人李祥順祥馬連升等將李毓昌始則用信末毒傷繼復勒斃懸挂似此慘遭奇冤實從來所未有允宜渥沛恩施以示褒慰故員李毓昌前已有旨令吉綸即委委員將其屍棺加槨送回交伊家屬安葬著施恩賞加知府銜即照知府例賜卹朕昨親製懷忠詩五言排律三十韻爲李毓昌闡揚幽鬱著吉綸採取碑碣石料量定高寬丈尺奏明再將御製詩發往摹刻俾循吏清風勒諸貞珉用垂不朽並著吉綸派委登州府知府前往李毓昌墳前致祭仍俟案犯定擬後將要犯二人解往山東於李毓昌墳前正法以申公憤而慰忠魂

謹案府縣扶同侵賑致斃省委所謂判令智昏者歟署淮安府知府王穀知情納賄竊立決王仲漢斬立決情尚浮於罪也總督鐵保革職遣戍藩司楊繼臬司胡克家革職則皆罪所應得李毓昌死事雖慘其叔李泰清 賞武舉繼子李希佐 賞舉人靈而有知亦當銜感於地下矣誰謂廉吏之不可爲哉

十七年奏准嗣後各省審理京控上控及命盜等案遇有議請展限者均由該督撫督同按察司親提人證覆行查訊實係不能完結方准請咨展限若案本易結毋庸展限者即將控詳之員據實嚴參其距省遠州縣遇有詳請展限者查照秋審解勘之例由該管道員提訊轉詳倘有徇隱情弊經該督撫查出併嚴參吏部查定例州縣官詳報展限案件經該督撫按察司提訊若案本易結毋庸展限者將控詳之州縣官照易結不結例革職至距省遠州縣詳請展限照秋審之例解勘由該管道員提訊轉詳者查有徇隱情弊將該道員照徇隱例降二級調用

十八年九月白蓮教匪林清伏誅

禮親王囑亭雜錄 白蓮邪教起自元末紅巾之亂明有唐賽兒徐鴻儒等其經卷皆盜襲二氏之言文極鄙陋又以真空家鄉無生父母八字爲真言書於白絹暗至供之其教以道祖爲重又有天魔女諸名位自京畿迤南習者頗衆乾隆中傳文忠恆任步軍統領時捕獲黃村妖婦某氏伏誅究治黨與風稍熄而蔓延至楚豫秦蜀諸省遂有嘉慶丙辰楚北揭竿之亂兵興九載然後撲滅其傳習家者又變名八卦榮華紅陽白陽諸名有林清者住宋家莊幼爲王提督柄家僮隨王於苗疆久頗解武技彼教推爲法祖家頗富遂蓄不軌之志 大內太監多河閒諸縣人有劉金劉德才等其家素習邪教選入 禁中遂與茶房太監楊進忠等私傳其教羽翼頗衆因與林清交結會辛未秋彗星出西北方欽天監奏改癸酉閏八月於次年二月諸賊以爲豫兆又其經有二八中秋黃花落地語遂附會其說謂 本朝不宜閏八月故欽天監改之不知康熙戊戌已有之也楊進忠面目兇險以鑄軍器爲己任暗於宣武門外鐵市中鑄刀數百柄林清結黨數千人其中祝現屈五劉第五劉呈祥宋進財陳爽李五等爲巨魁暗約於九月十五日午時入 禁城起事漢軍獨石口都司曹綸侍郎曹寅後也家素貧嘗得林清助遂入賊黨欲俟十七日 上駐蹕白澗諸大臣皆往迎 駕乘其閒而林清狙於經言未改期欲聚數百人入諸逆監以爲 大內地不廣闊難容多人妄恃林清果有邪術可致勝清又倚諸內監諂熟 禁中路爲道引遂以二百人爲額皆市井無賴初無智略謀又不祕頗爲人知祝現者本豫王府包衣人居桑疃村充豫府莊頭家頗富弟祝富慶頗不善兄所爲知反期已決奔告豫王豫王裕豐初欲舉發旋因壬申年 上閱南海子日王亦曾寓宿林清家畏罪不敢奏遽請司巡檢陳某訪知其謀於數日前申報宛平縣縣令某已有檢派弓兵會同擒剿之札既而不果步軍統領吉倫食吏也營員已申報吉倫以事干 禁鑲不肯究數日前方攜酒遊西山香界寺吟詠竟日託言迎駕白澗是日驕從方出都門有左營參將某舉與以告日都中情形大有

回測尙書請留吉倫厲色曰近日太平如此爾乃作此瘋語乎揮與竟去十四日林清賊分二隊其東自董村至者以祝現屈五爲首其西自黃村至者以李五宋進財爲首十五日午太監劉德才引祝現等入東華門有賣煤者與爭道賊脫衣露刃爲看門官兵覺察驟掩門賊喧然出僅陳爽十數人闖入屈五等皆遁今禮部侍郎覺羅公寶興侍值 上書房甫退直出遇賊寶興踰牆奔入時署護軍統領爲楊述曾殺數賊於協和門下而官兵受傷者無算寶興侍郎遂命掩 景運門入告 皇太子 皇太子從容布置命侍者以鳥鎗入並嚴命閉 禁城四門促官兵入捕賊劉德才引二賊入 蒼震門欲手刃太監督領侍常永貴洩夙忿爲太監劉某擊擒之其由西華門入者倉卒門不及闔遂全隊入楊進忠與其徒高廣福引之尙衣監爲製 上服處楊管乞其補綴而不與值司衣者拒之楊遂引賊入全行屠害有老婦數人藏荊棘中獲免遂入文穎館殺供事數人陶編修梁方校書聞門外履聲棄然突問曰 金鑾殿在何所陶僕某方提茶極至以身障陶賊傷數刃陶得以免賊遂叢集 隆宗門門已闔有護軍某知事急懷合符於身亦被數刃情然臥塔下合符得以保全賊由門外諸廊房踰牆闖 大內 皇太子立養心殿塔下以鳥鎗擊斃二賊貝勒蘇志亦趨入隨 皇太子捕賊復有二賊潛入內膳房屋中衆內監擊殺之諸王大臣聞變皆出 神武門入余在邸聞變馳馬入至 神武門莊親王蘇謀貝子奕紹亦先後至聞賊聚攻 隆宗門納蘭侍郎玉麟方迎 駕歸短衣踰牆入集城隍廟門前時官兵至者未驗百人餘皆僕隸衆錯愕無策鎮國公奕瀾勇士也掌火器營事因曰今日火器營官兵皆聚集箭備揀出征 時有謂可招而至也余應曰君言大是乃馳馬去鎮國公永玉護軍統領石瑞齡曰 禁內陰窳變恐不測可速備車乘以備 后妃之行宗室原任大學士蘇康曰此何等語乃敢出口耶衆默然成親王永理後至已被酒大呼曰何等草寇敢猖獗乃爾吾手擊之因脫帽露頂勢甚雄偉有內監言賊甚兇猛已攻 中正殿門入者約計二百

餘人蓋即其黨也須臾突瀾率火器營官兵千餘人入莊王率百餘人並矛數十從西城根進余在後督官兵後至者副都統公安成超勇公海蘭察子少年勇銳余撫其背曰君乃勳臣世蔭不可有墜家聲安乃奮勇向前遙聞鎗聲訇然知已對敵有數十賊入 慈寧宮伏房莊王同安成突瀾先後追至 隆宗門賊首李五方欲縱火莊王率衆擒之獲賊餘向南通時副都統蘇公爾慎鈕祜祿公格布舍方奉 命南征入京整行裝聞警趨入亦首先殺賊侍衛那倫者太傅明珠後也是日應值 太和門聞警趨入有勅其緩行者那故迂直曰國家世臣當此等事敢不急赴所守耶急趨至 熙和門門已閉榜徨間遇賊蜂至遂被害高廣福雜衆賊中引賊由馬道上城腰出白旗招展或書大明天順或書順天保民皆以白布裹首呼號於堆堞間突瀾蘇爾慎上城驅逐高廣福持旗呼衆突瀾射之自城樓墜殞 御書處蘇拉某導李五匪 御刻石楊開余督後兵自武英殿複道進理藩院員外郎岳祥海蘭察婿也甚勇健與余遇願從殺賊時賊有迎拒者鎮藍旗護軍校常山以鎗擊之墜於 御河山即下河擒之衆愈踴躍擒賊數十賊有自投 御河斃者有匿於城堞草中者有匿於 五鳳樓者天將黑與今禮部尚書穆公克登阿遇穆曰天已昏黑奈何余曰今十五夜有月蓋安衆心也穆不解余意曰月光終不及日光余即指心以示穆乃曰月光固皎如晝也莊王等皆入 隆宗門內余念西華門爲賊突入之所恐其乘夜奪門出因率火器營兵數百屯於門側會成王命護軍統領石瑞齡義烈公慶祥散秩大臣綿懷副都統策凌分守西 禁門慶公祥乃率其所管正藍旗護軍營弁兵至西華門會英誠公福克津原任禮部侍郎哈爾阿皆至慶固多智其營參領趙興爲緬中降賊德森保子勇健思幹與余露宿馳道上太監張泰者已己春同鄂羅襄共傾陷廣慶侍郎時亦通賊由城堞蛇行伏於東華門馬道上爲突瀾所擒始知有內監通賊狀至五更月色皎潔如晝余與慶公命岳祥率數十兵上城巡眺慶公又命長鎗手數十拒守西華門洞中夜

聞寒風凜然內務府衙門中尙有伏賊砍某郎中肩逃去大城內柝聲叢雜竟夜不絕蓋王念農侍郎麟率步兵巡邏甚嚴天將明忽暴雨軍士火繩俱滅聞 五鳳樓中有人聲余命火鎗齊發然雨勢甚大因退屯咸安宮門下兵弁無不怨雨非時者後始知是夜逸賊匿 五鳳樓欲於是時縱火突出會雨滅其種固 國家無疆之福也十九日 迴鑾命諸王大臣毋庸遠接以靖人心辰刻 上乘馬入都夾路士卒歡拜 上撫御士卒緩轡入 宮即下罪己 詔衆王公大臣集 乾清門跪聽皆不禁嗚咽失聲 上立開 內外城諸門以安人心 特賜將士食 命御前侍衛等視食畢然後覆 命又 命莊王及貝子奕紹等入 太廟社稷諸宮殿搜捕餘賊次日 召王公大臣於 乾清宮西 諭曰近日諸大臣因循怠玩有爲朕宣勞者衆必陰擠殺之以致有此大變余首奏曰 皇上此言真切中今日之病 臣等世受 國恩使今日有此事真愧死矣 上首肯者再又 諭曰前日朕聞報即命迴鑾 皇父陵寢在咫尺間亦不能謁前訛言有賊三千直犯御營之語朕諭御前王大臣不必驚懼俟賊果至汝等效死禦之朕立馬觀之可也因又 諭曰我大清以前何等強盛今乃致有此事皆朕涼德之咎衆皆嗚咽痛哭叩首請罪成王因言 皇上若此聖明百姓縱不能愛戴如父母何至反爲寇仇此必有致禍之根容臣密奏可也 上曰兄可急繕奏聞王大臣中如有能據忠愫者可繕摺以對朕裁定衆叩頭謝 上又曰此中亦真有爲朕出力者朕實知之不必因此生怠也衆又叩首出時有欲合辭耶丸藥使諸內監服之以卻其邪謀者 上笑而不答是時額駙拉旺多爾濟等奉旨率健銳營往勦東董村及宋家莊諸處賊已棄巢逃竄超勇王遂焚其室巡城御史曹恩綬陸泌道偵者巡邏於右安門獲太監楊進忠家書始知其通逆蓋伊引賊人見莊王率勁旅至伊即逃入直房閉門晏寢至是事定始遣僕通信與其家乃被獲實天意也 上命承恩公和公世泰至其家搜刀布出乃伏法二十三日 上御豐澤園親訊逆黨諸御前侍衛

佩刀環立威儀甚肅 命莊王超勇王坐 御座側引劉進才劉金至
上問曰汝等皆朕內侍朕有何薄待汝乃萌此逆謀二賊俯首稱 主子
饒命者再 上笑曰汝既順林清何知君上二賊無詞 上命夾打畢率
去復引林清至 上問其何故蓄逆林清曰我輩經上有之我欲使同輩
突入 禁門殺害官兵以應劫數 上又訊問其黨清曰有包衣人祝現
爲黨中巨魁 上同顧刑部諸臣問祝現何在尙書崇祿奏曰業經正法
侍郎宋公銘奏曰尙未緝獲 上首肯之顧莊王曰外間言太監皆叛今
日審明除此數逆外非盡叛也 玉音申諭者再蓋安反側心耳因 命
將林清等即時正法余是日亦佩刀隨往後有妄言林清有諸邪術悖逆
不服之言皆齊東語步軍統領五城御史等陸續捕獲從逆賊黨 上優
賚升擢有差革吉倫玉驊職其日未及入 禁城之大臣大學士劉樞之
刑部尙書祖之望禮部尙書王懿等皆 命致仕副都統楊述曾以協和
門捕賊功有死成邊護軍統領明志以是日入直乃其本管旗分官兵亦
革職發往 東陵贄禮郎上行走後十月開步軍統領英公和訪獲曹福
昌從逆有證據其父曹倫至 御訊於 豐澤園即時正法以失察故革
祿康裕瑞職發往 盛京居住逾年裕豐匿告事發革王爵後賊黨雖陸
續就擒然祝現劉第五漏網殊使人憤恨也
臣謹案林清之變天地動搖宮禁喋血倘非天祐其禍且不可言而推究
亂萌實由句給太監及乎殆哉茲特載囑亭雜錄語亦以著炯戒云爾
又定習教罪名奉 諭刑部奏酌議傳習白陽等教分別治罪條例一摺嗣後
審辦白陽白蓮八卦等邪教凡傳徒爲首者著定擬絞決其紅陽等教及各項
教會名目即照刑部所議辦理至此等愚民平日惑於邪說罔識禁令見在大
加懲創許以自新惟在地方各官詳爲化導使小民共知學習不經符咒斷難
獲福而國憲森嚴禍將不測雖至愚之人亦當惕於利害勉爲良善著步軍統
領五城及直省督撫將軍副都統府尹等各出簡明告示將新定罪名及自首
限期剴切曉諭

十九年三月 諭曹倫身爲職官甘心附從逆賊林清謀爲不軌罪大惡極實
從來所未有其身已顯伏國法不可不將其逆蹟書之簡冊俾令遺臭萬年著
國史館將該逆事實編列逆臣以爲亂臣賊子之戒
八月已革知縣萬永福正法奉 諭百齡等奏審訊已革知縣萬永福妄遞書
本按律定擬一摺萬永福前在山西知縣任內以妄行條奏斥革回籍不思安
分居家此次復遣人在貴州學政衙門陳遞書本竟敢誣託先師降筆演爲策
略實屬侮聖造言書中謬妄甚多其最甚者如上 陵以太子代行 闕聖宜
去帝號此二語即罪在不赦仰惟 皇考高宗純皇帝特輯儲貳金鑑一書以
前代建立太子流弊甚多不可踵行如有建言以立太子爲請者即行正法煌
煌 聖訓卓越千古國家億萬年所當遵守萬永福何人敢於援論及此又我
朝崇奉 闕帝備極尊禮歷荷 神庥助順上年九月間逆賊潛入禁城以及
冬間克復滑縣皆曾顯著 靈佑朕心中欽感方且特加 封號萬永福以爲
宜去帝號慢藐執其該督等奏請將萬永福照大不敬律擬斬即行正法本屬
罪所應得姑念該犯係因革職後妄思起用熱中顛倒以致心志迷亂語無忌
憚著仍照扶覲本律應絞即行正法伊弟萬永實與該犯同設此盤著改發黑
龍江伊徒吳希哲代遞書本著改發吉林即行分別起解此二犯至配所後交
該將軍嚴加管束如再違詩文胡說亂講即行正法切勿姑息至貴州學政李
宗昉於萬永福遺徒投遞書本懇其代進該學政有奏事之責應一面奏聞一
面咨審乃僅移咨巡撫辦理亦屬不合李宗昉著交部議處
二十年奏准嗣後謀殺人而誤殺其人之祖父母父母妻女子孫一命首犯依
謀殺本律擬斬監候從犯仍擬滿流若謀殺一家二命及三命以上除首犯仍
照誤殺旁人一家二命及三命以上本例分別問擬斬決斬梟外其爲從下手
傷重致死及知情買藥者如誤殺一家二命而及三命而非一家者發往新疆
當差三命以上發往新疆給官兵爲奴
又直隸總督那彥成奏爲遵 旨查辦並將先已訊出端倪奏明密摺事竊准
軍機大臣字寄奉 上諭王秉衡即王景曾其族分住直隸灤州及盧龍縣等

處以大乘教清茶門分往外省傳徒斂錢茲王秉衡自直隸至楚省復來江南轉傳柳有賈金標致逆犯方榮升釀成巨案該犯實爲首禍見已擊獲解赴湖北訊明嚴辦昨據那彥成奏於盧龍緝獲王殿魁等犯並查提王姓充徒各犯分別審辦石佛口王姓一族世傳邪教歷年久遠蔓延數省見已屢次犯案著那彥成即派委幹員前往澤州及盧龍等處將王姓族中傳教之人全數收捕勿令免脫一名解至省城嚴行審訊明後將爲首傳徒者問擬絞決其爲從者分別發遣流徙並向各該犯家中嚴密搜查將所藏九蓮如意皇極寶卷真經元亨利貞論匙經及一切邪悖經卷全行起出封送軍機處呈覽務令盡絕根株勿稍留遺孽除惡務盡切勿姑息欽此伏查 前在河南辦理教匪所有擊獲教犯逐件審訊彼時即係盛泰等隨同辦理 臣即屢諭盛泰等令將各處習教之人何處最多傳至何人逐人訊問逐件留心以備查辦務絕根株庶免別滋事端而盛泰亦最肯用心存記又在保定府任內審辦邪教最多是以直省傳習邪教源流惟 臣與盛泰稍知梗概今欽奉 諭旨謹據 臣等所知略爲陳敘當日據獲到教匪各供滑縣鬧事之人訊係震卦教凡有在教者均稱爲東方震宮王老爺門下其王老爺係首先傳教之山東荷澤縣人王中已於乾隆三十七年犯案正法林清徒黨多係坎卦教凡有在教者均稱爲北方元上坎宮孔老爺門下其孔老爺係首先傳教之山東甯陽縣人孔萬林亦已於王中案內正法至大乘教金丹八卦教義和門如意門等教凡有在教者均稱爲南方離宮頭殿真人部老爺門下其部老爺係首先傳教之河南商邱縣人部生文已於乾隆三十六年犯案正法又訊有清茶門教係滑縣人王正紀所傳當即擊獲辦理訊係澤州石佛口王姓分支當時即已飭令密記存查 臣於到任後查辦各項教匪查得嘉慶十六年經溫承惠審辦過鉅鹿縣民孫惟儉等係以吳二瓦罐所傳之好話教即離卦教改名大乘教賄串孔傳標借修尼山祠宇爲名惑衆斂錢一案將大會首孫惟儉等五名分別擬以絞決監候二會首宋連捷等九十餘名連吳二瓦罐一併擬遣其散會盧珍明等一千六百三十餘名奏准取具悔結存記檔冊再犯加等治罪十七年又經溫承惠擊辦過

前案內散會首復圖與教私離偽寶印蓋護道榜文之劉福名等三十餘名口分別斬決發遣是年又擊獲澤州李家套民董懷信等三十餘名傳習金丹八卦教審出曾經入教男婦五千一百餘名將董懷信等分別斬決發遣其餘男婦取具悔結存案十八年冬大乘教案內擬絞監禁之大會首李經在監勾結同教田岐岐散旗謀逆經署督臣章煦及臣在軍營訪聞分起委員擊獲李經等奉 旨當下辦理旋又究獲八卦教內首要逆犯張九成楊遇山宿元謨劉坤并河南離卦教首邵生文之孫邵坦邵劉功等分案奏明擬以凌遲斬遣惟查愚民私相傳習邪教一時原難稽查是在地方官時刻留心於會犯教案之犯曾經習教之家不動聲色嚴密稽查務使不驚不擾隨案究其源流庶可斷其傳習 臣仰荷 皇上昇以畿輔重任秉承 指示夙夜實力整飭不敢稍存疏懈斷不肯令邪惡復萌釀成巨案除陸續擊獲滑縣潛逃從逆各犯並林清案內應行緣坐餘黨不敘外其離卦一教仍未悔改之案如所獲平安縣傳習離卦教之楊俊等究出首先傳教吳二瓦罐之子仍稱少當家之吳洛雲並其徒大頭目路運等一案交河縣傳習一炷香離卦教之齊聞章等搜出違背十王經卷一案滄州吳久治路老等傳習佛門教一案青縣李八葉幅明等傳習義和門教一案又青縣邊二從習白陽教預知逆情一案景州葛錫華等從習離卦教預知逆情一案祁州邢士魁等傳習如意教搜獲妄造表名掛號總冊一案故城縣葛立業傳習義和門拳棒預知逆情一案均經訊明教名雖別俱係離卦教之子孫徒黨遂起奏明分別凌遲斬遣在案見又訪獲青縣尤明等傳習義和門離卦教一案東鹿縣馬楊氏傳習紅陽教搜獲騙高老祖經一案亦經奏明從嚴究辦至石佛口王姓傳教一案 臣先即存記前在湯山差次而奉 諭旨飭拿赴楚傳教之王姓當經 臣派員在盧龍縣安家樓莊訪獲自江南回籍之王殿魁並其子王朝萬二犯提省嚴訊據王殿魁供認於乾隆五十七年即在淮安溧水泗州江南等處傳徒伊即在山陽開糧食店五六年回家一遍遍供出伊族人在湖北傳教共有三人一名王書魯一名王泳太一名王興建王書魯先在江南儀徵縣傳教即在彼住家王泳太王興建俱在盧龍縣

者與其聞也

安家樓莊住又有在山西傳教犯案王如青之次子小名來子伊族石佛口有兩支俱在旗分東西兩院王如青是東院人其餘在安家樓莊及闕家莊係屬一支俱係民人等語續又據委員稟在安家樓莊拿獲王三樂王三畏二名訊據供稱伊等均未習教惟伊次兄王三聘又名王紹英曾在山西傳教犯案業已奏辦伊三兄王三福從前亦往山西回家後旋患瘋迷於本年四月內外出不知去向以王三樂王三畏所供全係狡卸且該族之人類多傳教犯案因查從前辦過王烈案內有王際昌王漢倬王秉鈞三犯分發刑臺等縣充徒行司提省實訊至王殿魁供出在湖北傳教之王書魯一犯見准湖廣咨會內開樊萬興案內之王姓即王大鼻子已准江蘇省拿獲核與王殿魁取供形貌相符其王泳太王興建二犯亦在湖北傳教當即飛檄各委員飭拿一面奏蒙

聖鑒在案今據百齡等奏將緝獲之王秉衡即王景曾解楚嚴辦查與王殿魁供出在湖北傳教之王書魯名不相符復提王殿魁研訊據供王書魯原係景字排行又名王景曾即王大鼻子屬實等語業經咨會湖廣督臣審究至王姓世習邪教分往各省傳徒蔓延數省屢次犯案怙惡不悛且灤州盧龍等處附近京畿並係盛京往來要路斷難容習教匪犯潛蹤誘煽誠如 聖訓必當將該族習教之人全數收捕分別懲辦嚴密搜查邪悖各經卷務令盡絕根株不使稍留遺孽前經派委保定府同知汪洞前赴該州密拿已據獲到教犯王三樂王三畏王鳳吉王來子等四名已飭提省訊辦並仍令該員在於該州石佛口盧龍縣安家樓及闕家莊等處實力查拏見又恭錄 聖諭密剴前委查勘永平府屬一帶道路之清河道韓文綺令其遵 旨就近督拏該族習教之人並搜查各項邪悖經卷解省嚴行訊辦不敢稍存姑息以期仰副 聖主除惡務盡之至意

臣謹案義和團之役亦中國一浩劫哉溯其源則百年以前 聖君賢臣業已懸為厲禁深切著明履霜堅冰由來者漸地方有司不能實力奉行醞釀久之發而為滔天之禍幾乎柱折維裂涓涓不塞流為江河萌蘖不扎將尋斧柯無論宰相須用讀書人即守土之吏亦未可以不學無術

二十二年十月伊蘇奏蕭鎮正法奉 諭我朝 列聖相承廣開言路朕虛懷納諫凡科道所上章疏其言是者無不採納施行即或讖見迂陋所言不當亦每曲示包容不特不肯誅戮言官即如前朝軾政廷杖諫臣亦從無其事本日朝審句到官犯內伊蘇奏蕭鎮二名俱予勾決伊蘇奏枉法貪贖法所難宥至蕭鎮職居言路得以上章言事徇情聽囑已干法紀乃竟賄賣條陳以奏事為納賂之具欲君犯上孰大於此若不加嚴懲則言以賄行顛倒是非變亂黑白勢將何所不至特將該犯明正典刑以昭炯戒內外臣工當知朕所誅者乃壞法營私行同市儈之小人於上章言事之諫臣毫不相涉也

皇朝續文獻通考卷二百四十三

刑考二 刑制

道光二年 諭大學士軍機大臣會議刑部奏改婦女實發爲奴條例內姑謀殺子婦及婦女毆差閨堂二條情節本爲可惡歷奉 特旨改予從嚴著照所議仍照定例實發不准酌改其婦女挾嫌圖詐翻控虛誣及因盜致縱容袒護之父母舅姑自盡二條著照原議概免實發視其原犯罪名量予監禁其監禁年限及在監復行滋事酌加年限等事該部即纂入冊例通飭遵行

八年 諭嗣後殺死一家三四命以上之案審明被殺之家實係絕嗣將兇犯之子年未及歲者送交內務府閹割奏明請旨分賞著刑部纂入冊例循照辦理

九年 諭朕因宗室近來積習往往以不干己事具控藉端訛詐降旨令軍機大臣會同宗人府刑部酌議條例具奏茲據查明定例分別從嚴酌議嗣後宗室覺羅人等告訐之案察其事不干己顯係詐騙不遂者該管衙門立案不行仍將該原告咨送宗人府照違制律杖一百實行重責四十板如敢妄捏干己情由貸准及至提集人證質訊仍係誣詐不遂串結捏控者即將該原告先行摘去頂帶嚴行審訊並追究主使教誘之犯倘狡辯不承認例先行板責訊問審係控欺虛誣除坐誣罪應斬絞者仍照向例請旨辦理外其餘誣控之案無論詐賊多寡已未入手但經商謀捏控不分首從俱實發吉林安置到配仍重責四十板以示懲儆其主使教誘以及添威助勢之犯無論軍民人等不分首從均照例發近邊充軍仍先枷號三個月滿日再行發遣係旗人照例銷除旗檔一律辦理即使所控得實但因串詐不遂捏情圖准者亦著照此例定擬不准以事出有因量爲援減著宗人府刑部即各纂入冊例永遠遵行並由宗人府刊刷條例通傳近支遠支各旗及八旗滿洲旗分咨行步軍統領衙門出示曉諭務令周知用示朕明刑弼教之至意

十二年 諭御史宋劾奏請嚴禁地方官衙署積弊以清訟獄一摺據稱近年來京控案件大約皆以衙署積弊申害爲辭民人刁健者固多書吏之借端

索詐誣害善良亦復不少外省州縣積習往往於蒞任後凡有公私費用先令書差墊出而後令其承徵地方錢漕及各項陋規扣價墊項謂之差墊又有假辦公名目令書差出具領結領取款項商同分用至後任交代時即將書差所具領結抵款轉流交終成無著謂之差欠本官既與衙署商議令其墊欠即已受其挾制而營私播弄諸弊叢生遂不能不委曲徇庇等語得吏奸胥最爲地方之害衙署不去則善良不安惟地方官潔已奉公方不爲所朦蔽著各直省督撫嚴加整飭禁革州縣與書差借墊陋習其各官交代時書差領券概不准據作抵款如有受制放縱及因循怠玩者即查明參辦至上控京控各案如審明實係書差詐害即按律懲治不得以迴護屬員之故兼護書吏致滋輕縱又議准嗣後差役押斃人命之案無論有無凌虐均令稟請鄰封州縣傳到屍親親同驗明不得任聽私埋如有私埋情事經屍親控告破案者官爲究明致死根由詳請開棺檢屍取具屍親甘結檢明後除訊係差役索詐凌虐致斃者仍各照本律從重治罪外若止係因病身死即將私埋之差役照地界內有死人報官司而輒埋藏以致殘毀者杖六十徒一年律加一等杖八十徒一年半

半控告之屍親訊無挾仇情節仍按誣告各本律分別科斷地方官恣任聽私埋及庇護差役不即開檢者交部分別嚴加議處其一切兇徒挾仇謀財致斃人命私埋滅迹之案告發之後如業將致死根由究問明白毫無疑義而屍傷非檢不明者亦即詳請開棺檢均毋庸取具屍親甘結

十三年刑部覆奏兩江總督陶澍等議覆給事中孫蘭枝奏敘銀出洋請明定例案一條查白銀一項雖非銅鐵製造軍器者比惟內地物產應供內地之用若私運出洋則內地轉形支絀應如該督所議另立治罪專條嗣後敘銀出洋一百兩以上請照偷運米穀一百石以上例發近邊充軍一百兩以下杖一百徒三年不及十兩者杖一百枷號一個月爲從知情不首之船戶各減一等問擬纂入則例永遠遵行

十四年 諭御史承光奏請飭禁廢員攻訐上司一摺據稱近來各省已革廢員挾制上司捏款上控之案層見疊出查其心迹實非爲公或動借盤費或訛

索捐復銀兩稍不遂意即行攻訐各上司受其挾制暗中消弭以致此風日熾請嗣後有列款控告原參上司者無論虛實概行飭禁等語國家設官分職大小相維爲大吏者果能潔已奉公嚴明御下則屬員平日羣知敬畏遇案糾參自可折服其心無敢置辯方今朝野清明上一體即開有一二不肖劣員因案牽革後膽敢誣捏控造挾嫌洩忿或交各督撫親提審訊或特派大員前往查辦其鬼域伎倆無難立時破露重治其罪即被訐之各上司始雖受其汚穢迨經審斷立即昭雪何必畏首畏尾多方消弭轉予該革員以挾制之端釀成刁健耶嗣後各省大吏平日於屬員之賢否留心考察遇案牽劾一秉大公自不致被劣員有妄行控訐之事倘舉劾任意不足服衆又安能禁被枉之員不行控告至屬員被枉本有准揭部科之條若不肖劣員被參之案本無不公或因需索不遂羅列多款圖洩私忿一經審出虛誣情弊定當照例加等治罪決不寬貸

二十年湖廣總督周天爵奏遵例用刑自請先行革職得旨著俟吳其浚等審明定案後再降諭旨又批嫉惡過嚴原當若是例外非刑有是理乎自古嚴明之吏未聞創造非刑即使情真罪當已爲過舉若有不白於其間於心忍乎於法平乎所謂猛以濟寬除惡務盡並非逞一時之忿專尚酷毒也又諭吳其浚等奏審明委員非刑斃命及總督信用屬員濫刑滋擾各情一摺此案已革候補知縣楚鑄在督署審案擅用非刑酷訊斃命並因委辦鹽卡違例株連刑責並將繫桿人犯任意疊杖拖斃多命慘酷已極楚鑄著先在省城枷號兩個月滿月發往烏魯木齊充當苦差湖廣總督周天爵創造非刑信任楚鑄在署審案並派總管鹽卡於應歸地方官審辦之件違例專委訊辦以致恣行威福拖斃多命並將匪犯親自捏傷兩目成瞽種種妄爲見經欽差侍郎逐款訊出該督一品大員輒逞一時之忿專尚酷毒實屬負恩任性周天爵著即革職發往伊犁充當苦差其該督署內伺候扛擡夫頭永行禁革所置非刑即著盡行銷毀並嚴禁問刑衙門效尤私設

二十二年 諭前軍機大臣會同三法司議請將已革提督余步雲依律擬斬

聲明情節較重請旨正法當令未經與議之大學士九卿科道再行詳議茲據合詞覆奏仍照原議定擬余步雲由行伍出身擢至提督與裕謙防守鎮海乃定海被擾總兵王錫朋等轉戰六晝夜之久余步雲並不督兵應援以致孤城失守三鎮陣亡已屬罪無可逭然使鎮海海波保全無事則失救定海之罪尙可稍從寬貸迨夷船駛入鎮海余步雲身在行間既不能衝鋒迎擊復不能嬰城固守鎮海失守退入甯波甯波失守退保上虞以一品武職大員身膺海疆重寄畏死貪生首先退縮以致帶兵將弁相率效尤奔潰棄城直同兒戲每一念及憤恨實深且廣東之關天培祥福江蘇之陳化成福建之江繼芸皆以提鎮殉難即定海失陷總兵王錫朋葛雲飛鄒國鴻力戰陣亡鎮海甯波失事總兵謝朝恩被敵轟擊落海身死裕謙以文員督師殉節獨余步雲係本省提督乃竟志在偷生視顏人世倘不置之於法不惟無以肅軍政而振人心且何以慰死節諸臣忠魂於地下余步雲著照大學士九卿科道等會議即行處斬派刑部尚書阿勒清阿監視行刑以伸國法朕辦理刑名悉本欽恤各省應死重囚苟有可原情節無不予以生全况係一品大員豈忍遽加誅戮似余步雲之見敵輒退首作屬陷實屬法無可貸不能不明正典刑也

咸豐四年 諭前任湖北巡撫青麟自簡任封圻以來正當黃州漢陽賊匪充斥之際武昌兵單餉匱本屬實情朕以青麟在學政任內保守德安郡城念其勤勞畀以重任疊據奏報省垣布置屢次擊賊獲勝計八十餘日中困苦艱難所奏原無虛假朕方節次嚴催各路援兵前赴武漢救應但以道途多阻未能迅速趕到青麟於六月初二日於大股賊匪攻城時業已派魁玉楊昌泗帶兵連踏賊營五處但能督率官兵感激衆心竭力鏖戰何至省城遽爾失陷即使嬰城固守坐待援師亦望解圍有日方當有過敘功縱或力盡捐軀不失城亡與亡大節褒忠有典豈不心迹光明乃本日接到青麟報稱於武勝門督戰時見城內黃旗皆出土匪內應兵勇潰散率與魁玉楊昌泗擁衆遠避爲移師就餉之謀徑赴長沙直是棄城而逃曷勝痛恨倘青麟爲收復武昌計或就台湧軍營併力進取或從官文乞師前來戴罪圖功亦可爲之曲諒長沙則去武昌

甚遠並非青麟所轄之地越境偷生何詞以辯若再加之寬典則疆吏守土之責幾成具文何以對死事諸臣耶所稱沿途攻勦擬抵荊州皆是任意鋪張希圖掩飾與前奏不敢畏葸巧避置城池人民於度外大相徑庭朕賞功罰罪一秉大公豈能以青麟前此著有微勞稍從末減青麟著俟到荊州時交官文即行傳旨正法中外臣民當知朕倚任青麟之念甚切而青麟衷心負恩自取罪戾國法具在豈能曲為原諒涼州副都統魁玉駐兵洪山賊由該處衝入咎無可免惟前赴長沙係由青麟率同偕往且非守土之官罪止失律著即革職與在籍已革總兵楊昌泗均交楊需軍營酌量差遣仍著隨時察看倘革員等不知愧懼並查有臨陣退縮巧飾推諉情事即一面據實奏聞一面以軍法從事

臣謹案髮逆之亂武昌屢次失守前有崇綸後有青麟棄城逃走崇綸因被逮畏罪自戕青麟按律正法而惟總督吳文鎔巡撫常大醇陶恩培先後殉難迭蒙予諡褒嘉此上諭所謂力盡捐軀不失城亡與亡大節者也其後何桂清常州敗走以私黨營救幾乎漏網幸賴文宗顯皇帝明

斷不為羣黨惑離稽誅數年卒正典刑當時賞罰明允故能轉敗為功建中興之大業自古姑息足以養奸紀綱一壞紛不覆亡隨之可不戒哉五年 諭前據載齡等奏強盜等案請從嚴辦理一摺當交惠親王恭親王奕訢大學士九卿等妥議具奏嗣據刑部遵議王慶雲請嚴定搶案罪名及御史唐王森奏請釐剔弊端各摺片均交原議王大臣等議奏茲據惠親王等詳議以聞朕惟立法貴乎因時安良必先除莠康熙雍正年間辦理盜案將法所難有情有可原之犯分別正法發遣乾隆年間大學士會同刑部議將夥盜曾經轉糾黨與等項仍同擬斬決參稽例意原於法外施仁之中仍寓除惡務盡之意立法本極周詳辦理無虞縱無如地方官奉行不善每辦一案把風接賊之人常倍於入室搜賊之盜甚或將病故在逃之犯指為法所難宥見獲之犯歸入情有可原以致匪徒漏網無怪盜風日熾嗣後凡遇盜劫之案著照王大臣等所議仍依強盜已行但得財者不分首從皆斬本律俱擬斬決其中把風接賊等犯雖未分賊亦係同惡相濟著照為首之罪一律問擬此外實在情有

可原之犯如年止十五歲以下被人誘脅隨行者仍照本律問擬倘或地方官仍蹈積習或另設名目巧為開脫一經發覺者即照諱盜例嚴行拿辦至搶奪之案總以人數多寡及有無兇器為斷如果糾眾夥謀持械搶掠兇暴情形與強盜無異若不從嚴懲辦勢必釀成巨案亦著照所議凡聚眾持械搶劫兇暴眾著者無論白晝昏夜均照強盜本律不分首從一概擬斬以儆兇頑而靖地方經此次嚴定章程之後各該地方官務當力圖整頓有案必懲用副朕執法持平明慎用刑之至意其吏兵二部所擬獲犯保舉及諱盜處分均依議行至尋常盜犯業經就獲自應按律懲辦御史唐王森請照格殺勿論之例准州縣便宜從事殊非慎重刑章之道著毋庸議

臣謹案強盜一項 國朝律例屢經變易順治年間大難初平反側未盡安靖仍照明律不分首從一概決斬康熙以來太平已久民風醇厚盜賊稀少故律外另定新例分別法無可貸情有可原無可貸者仍照決斬有可原者按例減發新疆為奴貨其一死至道光末年粵匪雲擾盜賊充斥非嚴法不足定亂經王大臣議定仍復舊律不分首從但係把風接賊一概駢誅即此條 上諭所載是也同治九年纂為定例可見刑罰世輕世重因時制宜之道至格殺勿論之律專指捕役殺賊而言載在罪人拒捕門內若殺非賊匪格非捕役不得輕引致開擅殺之端 諭旨較之洵慎重人命之意也

八年 諭刑部奏酌擬因瘋斃命罪名請改畫一等語向來因瘋連斃人命案犯係平人非一家二命者俱擬絞監候入於情實而致斃期功尊長尊屬一命另斃平人一命者向援服制之例夾籤聲請雖較斬輕重不同而一句一免殊不平允至連斃三命內有期功尊長尊屬一命者亦俱援服制之例夾籤更覺寬縱著照該部所請嗣後此項人犯除連斃平人非一家三命或一家二命者仍照例入於情實致斃服制一命復另斃平人一命者仍照例夾籤聯請外所有因瘋致斃平人非一家二命之犯著改入緩決辦理以昭畫一而示持平其致斃期功尊長尊屬一命另斃平人二命之犯無論是否一家俱著按律擬斬

立決毋庸夾籤聲請以重人命其本年秋審案內張懷一犯即著改入緩決辦理

九年二月 上御勤政殿召見怡親王載垣鄭親王端華軍機大臣內務府大臣尚書肅順等 諭柏葆著照王大臣所擬即行處斬

謹案科場大典例禁極嚴柏葆職司文衡適徇家人之請致大啟倖門辜胡可這然頗聞承審是案之載垣端華平日與柏葆有隙不能無稍輕重於其間是以 穆宗登極因御史任兆堅請 諭令柏葆子候選員外郎鍾謙帶領引見蓋所以示 朝廷之大公耳

又議准各省秋審人犯原擬緩決經刑部改入情實或奉 旨派員核議更改及由覆勘密之員奏駁更正者其應議處分就各該省秋審案數合併計算以五十起至二百五十起為限五十起內失出一案至五案均降一級調用至十案均降二級調用以次遞加一百起內失出二案至五案均降一級調用至十案均降二級調用以次遞加一百五十起內失出三案至五案均降一級調用至十案均降二級調用以次遞加二案以下免議二百起內失出四案至五案均降一級調用至十案均降二級調用以次遞加三案以下免議二百五十起內失出五案均降一級調用至十案均降二級調用以次遞加至四案以下免議至二百五十起以外仰毋庸分別起數統按五案降一級調用十案降二級調用之例核辦以上處分係失出加級紀錄准其抵銷如無抵銷應降一級調用改為降一級留任六年無過方准開復應降二級調用以外者即行實降仍照例聲明請 旨又各省秋審人犯原擬情實經刑部改為緩決或奉 特旨派員核議更改及由覆勘密之員奏駁更正者除一案二案仍照舊例辦理外至三案應降三級調用者即議以降四級調用四案即議以降五級調用均不准抵銷五案以上議以革任仍照例聲明請 旨

采於伊父程庭桂入闈後竟敢公然接收關節條子交家人胡升轉遞場內即係交通屬託關節情節罪重大豈能以已中未中強為區別程炳榮著照王大臣等所擬即行處斬已革二品頂戴左副都御史程庭桂身任考官於伊子轉遞關節並不舉發是其有心朦蔽已可概見雖所收條子未經中式而交通已成確有實據即立予斬決亦屬罪有應得惟念伊子程炳榮已身罹大辟情殊可憫若將伊再置重典父子概予駢首朕心實有不忍程庭桂著加恩發往軍臺效力贖罪此係朕法外施仁並非從死罪遞減亦非因其接收關節未經中卷姑從末減也其致送關節之謝森堪等本應照科場專條治以死罪惟與業經正法之羅鴻輝等尚屬有別工部候補郎中謝森堪恩貢生報捐國子監學正學錄王景麟均著革職熊元培著革去附貢生與已革候補郎中李且華已革候選通判潘敦儼已革翰林院庶吉士潘祖同已革刑部候選員外郎陳景彥已於二月間加恩免其死罪著照所擬均著發往新疆效力贖罪李且華之父前任刑部侍郎李清鳳見在原籍病故著該部查明李且華家次丁即於百日後起解如家無次丁著俟安葬伊父再行發遣降調湖南布政使潘鐸平日訓子無方著交部議處其應議之監臨監試專司稽查及內外簾執事各員並搜檢王大臣著禮部按照科場條例據實查明各該員所司何事應議之處詳晰開列銜名具奏再降諭旨另片奏未能究出冒名之人請旨議處等語載垣端華全慶陳孚恩著交宗人府吏部照例議處至科場條例本有專條刑部所擬程庭桂等罪名俱不在科場例內輒將向辦各案以已中未成比擬實屬不合業於王大臣等摺內詳細批示若照殊批給予處分恐該堂官等難當此重咎著傳旨申飭科場一案前後所降諭旨著即補入禮刑二部則例永遠遵行

十一年奏准嗣後救親致斃人命之案除父母主令其子將人毆死或先與人尋衅其子踵至助勢共毆斃命或兇犯理曲肇衅累父母被毆已復逞兇斃命各項雖死係親卑幼父母業經受傷應仍將兇犯各照本律定擬不准聲請減等外若並無前項情節確因救親起衅各案如死者係犯親本宗外姻有服